

近代中國史料叢刊續編第四十二輯
沈雲龍主編

松龕先生全集

徐繼畬著

奏疏·文集

文藻出版社

有限公司
印行

恭
信
德
水
心
分
州
井
縣
耶
耶

近代中國史料叢刊續編 第四十二輯

目錄

- 松龕先生全集 奏疏·文集 徐繼畬著
- 松龕先生全集 詩集·考略·叙傳 徐繼畬著
- 仙屏書屋初集文錄 黃爵滋著
- 志頤堂詩文集 目錄·文卷上 沙元炳著
- 志頤堂詩文集 文卷中·下 沙元炳著
- 志頤堂詩文集 詩卷一——五 沙元炳著
- 志頤堂詩文集 詩卷六——九 沙元炳著
- 志頤堂詩文集 詩卷十——十二 沙元炳著
- 志頤堂詩文集 題跋文上·下 沙元炳著
- 因社集 附：楊楚孫先生詩集 楊愷齡輯

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>




敘

是編奏疏二卷文集四卷詩集二卷又兩漢幽并涼三州今地考略一卷徐氏本支敘傳一卷予同里徐松龕先生遺著也先生以碩學爲名臣出入三朝歷臺諫任封疆所條陳時務洞中機宜前清道成之際海氛初煽英人百計狡嘗當事者率狃於侈大不能究厥底蘊或失則激往往有之先生蒞閩久務得其強弱勝負之所以然而不爲旦夕功曲意諮訪隨事防維大要不輕啓釁端示之無閒可入以服其心而屈其計而深識遠慮常燭照數計於數十年之前數十年之後覆成局而案之有歷歷不爽者焉惜當時輿論囂然廷議未協先生雖疊荷知遇卒不得諧抵瑕者尤媒孽之旋卽望議去而閩事亦日以壞矣先是朝廷命先生撫粵西時

相密陳以聞撫鄭祖琛易之粵西事敗幾危全局識者歎焉專具
五臺縣志同治初總理各國事務衙門奏設同文館先生奉召供
館職年已老徘徊卿署者三載時西教習畢利干丁韋良等皆泰
西名碩獨敬禮先生諸王大臣莫能擬也今先生歿四十年矣世
益變而事益亟而先生之一身始也紛然今也漠然嘻可慨也已
錫山生也晚未及親聆教訓而生先生之鄉讀先生奏議及詩文
集忠誠愷切規畫詳明未嘗不三致意焉初先生著瀛環志略板
藏同文館罕行世見者亦不之重自東瀛翻本出而坊肆乃流傳
殆遍蓋人心之好尚如此海防外復關心藩部有幽并涼三州考
略之輯凡邊疆形勢無不口講而指畫之今集中所載是也先生
以絕異之才承尊人廣軒先生家學平生最篤嗜兩漢書嘗有評

釋未及訪得諸著述亦多散佚茲從其門人畹香杜公處蒐得奏疏古文若干卷先生堂姪悅庭公所手鈔也晚而學詩不主一家稿出人爭誦之近復搜集若干卷依類分次都爲一編而以考略敍傳附焉鄉邦後學儻有學先生之學志先生之志者乎則是編之刻已足津逮至先生之爲傳人與先生文之必傳而無疑者則又不恃乎此也民國四年陽曆十一月五臺後學閻錫山謹識



松龕先生奏疏目錄

奏疏上

特叅州縣入省鑽營疏

特叅州縣諱災催徵疏

特叅藉端科斂疏

特叅退贓誘結疏

請整頓晉省吏治疏

請除大臣廻護調停積弊疏

政體宜崇簡要疏

授閩撫謝恩疏

報接任疏

報福州將軍出缺疏

報兼署督篆疏

覆查林則徐病體疏

請宋儒李綱從祀文廟疏

奉諭密防英夷疏

報英人租住神光寺並採買臺灣煤炭疏

再奉諭密防夷情疏

覆英夷租住寺屋寔情並鎮靜籌辦偵察謠言疏

籌防英人購買臺灣煤炭並換港口疏

覆官紳意見不合疏

奏疏下

揣度夷情密陳管見疏

覆周天爵原奏預防英夷疏

交涉華夷命案疏

再覆辦理夷務疏

覆英夷不肯搬出神光寺及釘塞砲尊疏

覆英夷搬出神光寺並琉球使臣遞文疏

再覆英夷搬出神光寺疏

三漸宜防疏

特參晉撫貽誤巖疆疏

請命將助剿疏

時充總理各國事務大臣

嚴查教匪以靖閭閻疏

商辦盜案稟上劉次白中丞

條陳山西防守事宜致王雁汀中丞

路鹽芻議致王雁汀中丞

松龕先生奏疏卷上

特參州縣入省鑽營疏

爲嚴禁州縣久離職守入省鑽營以重地方而息奔競事竊維州縣爲親民之官必須時常在署公事方無遺誤臣聞各直省州縣往往托故進省爲營求升調之計累月經旬遷延不返署門懸公出之牌典吏代拆行之事相驗則委之鄰封案牘則畀之幕友冤抑無控訴之所動釀巨案緝捕無催比之日一任逋逃吏治廢弛莫此爲甚以臣所知如山西州縣中史夢蛟林樹雲並稱能員史夢蛟任忻州最久一年之中在州署者不過三四月其餘八九月常在省中臣籍隸五臺密邇忻州知之最稔聞林樹雲任保德州亦復如此不知兩人終年在省所爲何事若云面稟公事何至曠

日持久如曰委審要事省中豈無幹員大約非爲本身營求遷擢卽爲他人旁通線索耳聞各州縣欲得好處者以兩人爲先容每到省中其門如市兩人在山西最久亦歷州縣甚多問其官營紳民絕無頌感不過長於酬應善於逢迎歷任上官倚爲心腹名爲兩地守土之官實爲省垣壟斷之首一則由忻州升知府旋調首府一則由保德州調署汾州府此其盤省垣之功效也查兩州地方百里戶口數十萬一歲之中常有七八月無官不知倉庫監獄何人典守命盜案情何人勘驗戶婚爭訟何人判理水旱偏災何人查辦幸兩州民淳事簡尙無他變而刑政之廢弛不問可知墮職守而啓奔競此風斷不可長恐各直省中似此者正復不少相應請旨勅下各該督撫嚴飭各州縣非奉檄調或親解要犯不得

無故進省其有事到省者事畢不得任意耽延希求調劑違者卽予嚴叅庶州縣各重職守而奔競之風亦漸息矣臣愚昧之見是
否有當伏乞皇上聖鑒謹奏

特叅州縣諱災催徵疏

爲特叅諱災催徵之州縣請旨飭查以紓民困事竊查上年山東
一省收成歉薄經該撫查明被災州縣分別奏請緩徵當蒙恩旨
允准在案臣聞上年山東被災登萊青三府情形最重該撫奏請
緩徵惟登州一屬不在其內查訪登州被災情形係上年七月間
海風陡作一日一夜勢極猛厲秋禾正茂之時全致偃折仆地竟
係顆粒無收與萊青不分輕重該州縣諱匿未報上年下忙錢糧
照舊開徵災黎竭蹶完納膏髓已罄目下青黃不接糧價騰翔賣

男鬻女道殣相望壯者棄產奔逃弱者填委溝壑人心洶洶朝不謀夕而今年上忙又開徵矣聞現在該府英文親赴各州縣勸捐蓬萊捐得制錢一萬餘千黃縣捐得制錢三萬餘千其餘各州縣亦俱捐有成數苟非情形急迫未必如此辦理何以上年秋間竟爾諱災不報既已諱災必須開徵既已開徵則分數不足便干叅處該州縣自顧考成勢必從嚴催比當此災荒極重之時富民猶可輸納極貧下戶嗷嗷待哺加以胥吏之追呼必且激而生變在該州縣不過貪得平餘陋規有心諱匿而民間慘酷情形置之不問如果登屬並不成災該府縣何以紛紛勸捐勸捐與催科並行尙復成何政體皇上軫念災區山東一省恩施普被而登州一屬獨困於州縣之屯膏以勸捐解玩視之謗而以催徵收囊橐之私

下爲民命益殘上爲國家歛怨居心如此何可姑容相應請飭下該撫確查該府州縣諱災實情從嚴叅辦速將上忙錢糧停徵緩至今年秋後庶渥澤得以下究而民困稍蘇矣事關民瘼臣既有見聞不敢不陳伏乞皇上聖鑒謹奏

特叅藉端科斂疏

爲特叅藉端科斂之知縣請旨嚴行查辦以儆官邪以蘇民困事
恭查上年恩詔案內祭告歷代帝王陵寢在山西者欽派平陽鎮
總兵邵費音往祭其商湯王陵在蒲州府屬之榮河縣界內臣聞
該縣知縣武履中於上年十月奉文之後在署內設席遍請書差
告以努力辦理大家沾光隨傳喚值年里長逐日在縣聽候辦差
城內設公館七處湯王陵設公館七處科派乾菜鋪墊銀一千

五百兩修理裱糊器皿燈籠綵綢紅氈夫馬一切雜派又五千餘兩其餘無名之費不可勝數該縣分十三里半每里按地丁一兩須攤銀六七八錢不等合計該縣地丁三萬餘兩自上年十月奉文之後胥吏四出日事追呼闔境騷然民不聊生臣訪聞之下不勝駭異竊思官祭品物例有支銷致祭大臣宜減從前往何至張皇數月腴削一方一切科派至二萬餘兩之多是該縣起意狼吞自飽私囊情節顯然兼恐該總兵有藉差需索情事山西祭告不止一處榮河如此他處恐亦不免相應請旨飭下該撫嚴行查辦勿事姑容勿任消弭以儆官邪而蘇民困是否有當伏乞皇上聖鑒謹奏

特參退贖誘結疏

爲特參退職誘結之知縣請旨嚴飭查辦事竊查上年恩詔案內祭告商湯王陵榮河縣知縣武履中藉端科歛多金經臣奏參在案臣風聞該撫委員查訊該縣武履中得信之後浼人向本地紳民說合退還科斂原贖令該縣各里長爲之出結該紳民良懦畏事業經爲之出結完案該撫疑其不實現在委員覆查等語臣竊思山西州縣貪墨成風或遇言官奏劾或遇民人告發則百計消弭化爲烏有此種風氣歷來已久該縣武履中既經科斂於前復敢以此等伎倆脅誘紳民爲之出結了事現在該撫雖委員覆審而所委之員不過本省道府道府仰食州縣向來聯爲一氣原審之員既廻護該縣覆審之員必廻護原審該縣紳民既爲出結展轉欺蒙該撫亦將無如之何而貪官汙吏終立於不敗之地從此

益無忌憚矣相應請旨勅下該撫將該縣暨經年書差提省嚴究
摘傳紳里長明切曉諭務將該縣退贓誘結實情一並審出按
律懲辦庶墨吏稍加做畏而廻護消弭之積習可略除矣臣職司
耳目既有所聞不敢不陳伏乞皇上聖鑒謹奏

請整頓晉省吏治疏

爲晉省吏治廢弛請旨嚴飭整頓以肅官箴以除積習事臣竊維
致治之道首厲官方官方既肅而後民風日趨淳樸臣籍隸山西
知其風土山西民俗勤儉古稱唐魏之遺賦稅如期不煩追比農
賈相半絕少曠游惜身家而畏官吏重羞惡而鮮壽張在各直省
中民情最爲安靜邇年來巨案迭興大吏多獲咎以去論者遂以
山西一省昔稱樂土今爲畏途而不知皆吏治之不肅有以致之

也大端有二請爲我皇上言之一由於操守之不講也晉省向有富足之名謁選者掣得山西欣然有滿載歸來之意然山西州縣陋規如平餘雜稅之類亦復無多辦公之餘斷不足酬其夙願繼之以請富戶賣案首猶不足也於是相率而取之詞訟晉民良懦畏事富者尤甚一人被繫舉家憂惶習知非賄不行不敢不傾囊以獻但得訟息額手稱慶雖復傾家蕩產斷未有敢以勒索等情上控者累萬盈千收入囊橐而安然無患也併不潔之虛名享無窮之厚實上官飽其酬應不特不加叅劾或反登之薦剡如榆次案之呂錫齡調繁缺者也太谷案之李聯蒙調首縣而加升銜者也一省之中相習成風恬不爲怪或遇賭博鴉片等案牽連富家子弟官吏欣然以爲奇貨其視案牘取錢竟如他省之陋規尋常

者在百姓耳聞目見習爲故常未較曲直先籌苞苴幾不知人間有清白吏而該州縣等廉隅旣毀罔惜聲名竭其聰明才力盡萃於納賄之一途至於民生之休戚地方之利弊無復有過而問焉者矣此在他省固亦不乏而在山西則尤爲錮習者也皇上澄叙官方山西大吏屢以不職蒙譴邇者巡撫兩司新經特簡在該臣等受恩深重自當整躬率屬力挽頽風惟積重難返之勢破除匪易相應請旨勅下該撫司等力矯從前廻護陋習嚴飭各州縣洗心易慮自立檢閑訪其聲名狼籍者從嚴叅劾其有民間上控牽及地方官受賄情事者提省嚴加追究必使盡情敗露置之重典不得發交本管道府任其消弭或有操守廉潔民情愛戴者加以獎勸優以升擢務使貪廉異迹賢不肖殊科庶乎人知勸懲而吏

治蒸蒸日上矣一由於重案之不辦也山西民情慳拙不諳機械
卽間有好訟之徒亦復伎倆淺薄其明習吏文能持官吏之短長
者蓋絕無而僅有遇有命盜重案辦與不辦任州縣之顛倒而不
敢深求其故於是該州縣等遂以消弭爲秘訣有人命聽其私和
而不究者有橫遭慘死勸令掩埋而不辦者有逆倫服制之案開
釋而不辦者有業經取供收禁忽無故而縱去者有改盜爲竊者
有報盜而不勘不緝者有刃傷事主而不究者其言曰化大爲小
化有爲無而其實則諱大爲小諱有爲無在該州縣等不過憚煩
難圖安逸省推鞠之勤勞避承緝之處分而善良日見消沮強橫
愈以得志間有不勝冤憤瀝情上控者該上官又以爲州縣業經
消弭翻案必須叅劾授意覆審之官必使之恐嚇捺磨照合原案

而後已小民稔知上控之無益也不得不隱忍息事該州縣有恃
不恐遂無不消弭之事矣夫彰善癉惡者所以勸懲斯民而趨之
向善也若使竊劫不捕殺害不償則是凶盜善良無所分別又何
怪趙城教匪之揭竿而起也此種情弊在別省爲偶見而在山西
則爲牢不可破之積習相應請旨勅下該撫司嚴飭各該州縣遇
有命盜重案據實詳辦倘有隱匿不辦者經該管上司訪聞或民
人告發先將該州縣奏參解任提省嚴究如係有意消弭卽將該
員嚴行參辦庶該州縣等聞風知儆刑政漸舉而吏治日有起色
矣以上二條臣爲整飭吏治起見是否有當伏祈皇上聖鑒謹奏

請除大臣廻護調停積習疏

爲請除大臣廻護調停之積習以核名實以振綱紀仰祈聖鑒事

竊維國家立政期於大法小廉外而督撫膺封疆之寄內而卿貳分部院之司聖主簡任賢能於庶司百僚之中特加拔擢置之華顯爲大臣者固宜公忠體國不避怨嫌庶足以核名實而振綱紀臣伏見比年以來外省巨案迭出或經言官彈劾或係民人控告皇上權衡輕重有交督撫查辦者有欽差大臣查辦者乃查辦之事大半融化消弭竟未有水落石出大快輿論者嘗揆其情形不外兩端督撫之積習曰廻護欽差之積習曰調停督撫之廻護也有故如地糧之平餘漕米之折色驛站之差徭行戶之官價州縣藉以辦公相沿已久而非奉明文究屬違例或有刁衿訟棍挾嫌京控坐誣則本非虛妄據實則必湏叅官苛一現任之州縣屬員不免含冤裁一歷久之陋規公事愈形掣肘不得不宛轉消融化

爲烏有此廻護之出於不得已者也乃久之而積習漸深遂至官
吏之枉法命盜之沈寃無不從而廻護之每遇發交之案授意承
審之員先思開脫之方次講彌縫之術恐科道之復言則以風聞
有故釋其妄劾之慙恐原告之翻控則以懷疑有因免其反坐之
罪其說曰體恤屬員其名曰護持大局務使臺垣知彈劾之無功
而白簡不復施紳民知京控之徒勞而奔訴不復見一省之中苟
安無事是爲太平而貪墨之倖免不問也寃抑之莫雪不問也此
督撫廻護之積習牢不可破者也至於欽差大臣俱係多年京秩
深於閱歷熟於世故所忌者喜事之名所避者深刻之謗祿位崇
高恆虞蹉跌風裁峻厲懼招怨尤且與外省督撫司道半係年家
故舊多有交際往來當其奉命出京已存一苟可塞責不欲深求

之之見迨乎入境以後館餐殷勤迎候祇肅見面生情萬難忽置於是設法調停爲一切瓦合之計事有數款則洗刷其重者而留其最輕者事止一端則掩沒其眞者而留其疑似者使被劾者雖罪吏議而不致大傷入告者雖成子虛而不致相激歷來奉簡書者以是爲萬全之策分位尊則擔承有力保全衆則感頌必多亦幾幾成爲積習矣夫事達天聽中外震悚使出親信耳目具瞻明是非而別黑白愜輿論而儆官邪所關洵非淺鮮乃委曲消弭直同於鄉里之和協失天下之望啓狎玩之心名實之日淆綱紀之不肅未必不由於此况乎使節出京沿途騷動驛站疲於送迎地方困於供應惟直隸一省習爲故常夫馬之外所費無多此外各直省修飾公館犒勞僕從鋪墊必須文錦庖廚日進珍饈雖奉差

大臣潔己自愛杜絕苞苴而一切鋪排動須鉅萬故冠蓋久駐之地虧空必多此種情形自在聖明洞鑒之中欽差之所以屢發者皇上之不得已也豈欲諸大臣馳驅千里外作和事老人哉邇者廣東一省發欽差者至三次矣原其案情一公正道府足以完結乃是輶之出至再至三言事者屢瀆聖聰奉差者屢煩聖慮幾於大廷之上無一可恃之人章奏之來無一可信之語上虧國體下滋物議不知諸大臣受恩深重何以自安臣竊惜諸大臣徒顧情面蹈於欺罔而不覺也五月間欽奉上諭朕綜理庶政十六年矣諸王大臣尙不知朕惟求一實字耶等因欽此聖諭煌煌臣恭繹之餘曷勝欽佩伏思聖主當陽諸臣畏法在外之督撫鯁鯁救過求所謂大貪大酷敢於恣縱者無有也在內之公卿斤斤自守求

所謂作威作福致於專擅者無有也然而利未盡興弊未盡革綱維未見其日張風俗未見其日厚殆有故焉所短者惟一實字耳大臣之負清名有時譽者大約以緘默不言爲慎密以圭角不露爲深沈以漫無可否爲和平以多所容忍爲寬厚以模稜兩端爲和衷濟事之道以遵循故事爲奉公守法之規觀其章奏所敷陳似乎精密周詳了無遺憾而實則鋪張粉飾紙上空談稽諸事實大謬不然於聖訓所謂實字者固相遠矣如督撫之審理控案欽差之查辦事件據實推求何等直截而必出於迴護調停而後已此其不實之明驗也一事偶然失實所關猶小中外習於欺蒙所關甚大相應請旨勅下督撫部院大臣痛除情面力矢真誠斥鄉愿之陋習溯正直之遺風於聖訓所謂實字者恪遵深體夙夜無

忘庶乎名實不淆而綱紀日振矣臣幸值昌言無諱之世不敢避
譏切貴近之嫌愚昧之見是否有當伏祈皇上聖鑒謹奏

政體宜崇簡要疏

爲治法漸多具文政體宜崇簡要敬陳管見仰祈聖鑒事臣竊維
古今治術時各異勢而大致不外兩端開創之初大難甫平政令
簡質其病在於疎略而核實之意多守文之世百事求詳法制周
密其病在於煩瑣而虛文之患起歷觀往古大抵如斯我國家重
熙累洽垂二百年被列聖涵濡之澤經數世漸摩之化幅員之大
聲教之廣戶籍之繁文物之盛稽諸前古罕有倫比皇上宵衣旰
食勤求上理十六年中兢兢業業所謂以實心行實政固天下臣
民所共見共聞者惟是承平既久庶務日繁庶務繁則政令多政

令多則科條密科條密則奉行漸不以實而諸事習爲具文臣伏見近年以來言官申明舊例部臣改議新章或邀特諭通飭或奉俞旨允行閣下之部部下之督撫督撫下之司道司道下之府廳州府廳州下之州縣牌文一張粘抄一紙司簽者纍纍抱持置之案上閱一事由畫一月日發房存案如是焉而畢矣求其細閱一過者不可多得也而何論乎奉行也夫令行禁止朝廷之所以整齊萬物也而今日之弊則患乎令之而不行禁之而不止卽如保甲之法三令五申所得者胥吏斂錢門牌一張而已其實奸宄混迹漫無稽察者如故也鴉片之禁三令五申所得者州縣出結年終一報而已其實販賣成羣肆無忌憚者如故也觀此兩端其餘亦大概可知臣以爲令之而不行不如不令也禁之而不止不如

不禁也何者未令未禁之先彼猶懼不測之威而不敢存忽視之見若夫令焉而不行而依然日日而令之禁焉而不止而依然日日而禁之彼且以爲當其令也本不求其必行當其禁也本不求其必止姑爲是空言以符合事例而已又何怪其視爲具文而束之高閣哉然以今日事例之繁多而一一責之成效則雖嚴刑峻法亦有所不行何則夫一事之行非易易也理可行矣揆之以勢勢可行矣量之以力力可行矣寬之以時夫而後責之以成功稽之以明效其有廢閣不行者嚴法隨之如是者歲不過數事焉耳若夫不揆其勢不量其力朝三暮四紛至沓來一事未行數事復積前事未竟後事已改雖使強能之吏竭蹙爲之亦苦於日不暇給不得不概從棄置矣棄置之後遲之又久終無有後咎餘責則

又何樂而不爲是故所奉之文與例不盡合也所行之事與文不相涉也所奏之案與事不相符也是之謂名實不符名實不符而欲吏治之日上何可得也臣嘗稽諸古訓書曰臨下以簡論語曰居敬而行簡易繫辭曰易簡而天下之理得矣以是知簡之一言固治法之樞要簡非疎略之謂乃核實之謂也臣竊謂當今時勢宜簡者有三一曰教令宜簡欽惟我皇上廣開言路採及芻蕘凡諸臣之所條奏苟有片長可取無不仰邀俞旨通行訓諭所以下察邇言上裨國是誠堯舜之用心也惟是中外疲玩之積習由來已久遂致言之諄諄聽之藐藐記有之王言如絲其出如綸王言如綸其出如絳言所係之重也今或以煌煌聖諭而布告之餘視爲泛常之文檄漠然不以經意輕褻甚矣臣以爲諸臣之所條奏